

COLUMNA

En il tren: Attenziun, qua vegni fatg il belauschen!

CHATRINA JOSTY-KREUZER

L'auter di sun jau puspè ina giada viagiada cun il tren da Berna vers il Grieschun. E senza vulair hai jau fatg il belauschen duas giuvnas Sursilvanas. Jau n'hai propi betg vuli – ma i n'è betg ò auter. Cler ch'ellas han pensà che nagin na chapeschia. Tgi chapeschia rumantsch en il tren da Turitg a Cuira?! – Ma propi, igl era schon magari hart da chapir lur rumantsch modern.

Quai che jau hai chapì: Las duas cute-as giuvnas cun venters bluts, sco ch'igl è halt moda il 2022, eran stadas ensemen a Turitg a far ina shoppingtour. E gist sesidas en il tren, eran ellas anc vi dad editar lur video u reel u story u co che quai ha num per Instagram.

Natiralmain sto esser musica en il video, musica ch'ellas han tadlà senza Kopfhörers uschè ch'igl ha dà in pau il feeling da pli baud, cur che tuts empruvavan or ils Klingeltons da lur natels.

Bun pia, la story davos la story è ch'ellas duas, che n'èn ensasez betg BFFs (Best



Friends Forever) èn stadas ensemen a Turitg e che la BFF dad ina dad ellas vegn ad esser u huara permalada. «La scuidonza vegn ad esser gronda, aber quei ei a mi schisseglichen», di la blonda. L'autra, quella cun ils chavels brins, discorra uschè da bass che jau na chapesch nagut. En mintga cas: Ussa vegn fatg il posten...

Duas minutas pli tard, la blonda: «Jeu hai gia 16 views! In pèr likes e cunzunt in Herz! Ah, quella ha era fatg il liken. Aber jeu sai bu sch'ella manegia serius ch'igl ei cute...» – La brina di insatge che jau na chapesch betg. Segir ha ella gia dapli likes.

Trais minutas pli tard, la blonda: «20 views,

aber igl ei unscharf, quei hassegiel! Cons views has ti?» Ed uschè vinavant. Tranteren dattan ellas la bucca (la blonda) sur dad ina conscolara a la Kanti (!). Or dal punct da vista linguistic èsi fitg interessant tge ch'ella lascha ora: «Quella ei schon huara hinterhältiga e fallida», «ella vesa or sco in holi», «quella sa buca stuppar la fressa», «siu frar ei era schi hässlich»... Ma or dal punct da vista da la maniera e dal bun cumportament èsi magari frogwürdig.

Per fortuna midan ellas tema: «Tgei sugus questas ils megliers? Verd ni cotschen?» – Ed jau vegn a savair ch'i dat dus differents verds tar ils Sugus. Ed jau vegn a savair anc dapli: cura che nus essan arrivadas a Cuira han vesì 81 followers la story da la blonda.

Ed ina na-followra ha udi ella. E tut ils na-followers lecturs e lecturas da la Quotidiana han uss legì ella. Donn ch'i na dat betg in button per far il liken en gasetta!

Chatrina Josty-Kreuzer dat scola e viva en il chantun Berna.